

平定粵匪紀略

平定粵匪紀略卷七

咸豐八年戊午正月楚軍進勦安徽太湖逆勝之

皖逆糾豫捻犯商固旋擾光州六安窺伺隨賡一路
官大臣檄訥總兵欽襄陽道毛鴻賓督鄉團會同副
都統舒保扼要監察情形爲緩急備而太湖渡石牌
等處賊黨連營三十里略計七八萬衆乘我軍度歲
之際竄近蘄州界官大臣等豫度有此詭謀密飭準
備經管帶訓勇之唐糧道訓方連戰擊退正月初七
八等日又竄荊橋好漢坡等處都將軍派巴依爾呼

蘭石清吉等赴宿松協守而飭副都統多隆阿選三營四超馬步隊迎勦賊衆於仙田舖鏖戰風火山礮斃多名追抵太湖城賊沿江逃竄生擒長髮逆百餘獲礮械無算

二月楚軍分道勦逆大捷收復安徽英山縣

都將軍已追勦太湖獲勝遂連營宿太以拒賊衝而僞燕王秦曰綱遣其黨北趨避實擊虛欲犯蘄州蘄水時李布政孟羣回固始故六安之賊亦併力上竄陷英山縣分七路竄羅田署羅田縣知縣崔蘭馨會

在籍主事姚敦禮督練勇連日鏖戰二月十八日大敗賊於樂利河焚燒其壘追勦二十餘里乘勝圍攻收復英山縣唐糧道訓方亦大捷於黃泥阪守備梁洪勝生擒僞丞相韋朝綱逆股又由黃花嶺竄楚境之楓樹坳牛頭冲等處都將軍派參將富森保德明前往南陽河迎擊唐糧道亦奉官大臣檄會勦賊築壘北岸依山爲壘數十座唐糧道先遣兵勇自下游渡伏岸北山谷間而親整隊伍列陣南岸賊渡河而南都司余際昌邀擊之知縣丁銳義守備張養吾爲

兩翼左右衝突賊紛紛潰我軍乘勝北渡壘中賊已
陳於山腰潰賊續至而山谷伏兵起賊大驚我軍合
力併擊殲斃無數橫尸滿坑計平賊壘二十九座楚
軍勢振都將軍之宿太諸營始紓後顧憂

江南軍攻克秣陵關

秣陵關爲金陵南面外蔽賊守甚堅二月初二日和
大臣派總兵李若珠等移營節節進逼直渡河北將
黃泥庵等處賊壘蹋平斬關直入賊匪紛竄豫派副
將劉季三游擊馬德昭等潛伏葛塘寺等處截勦其

殺賊五千餘人遂於十四日夜刻克復秣陵關

三月英山羅田逆竄商城官軍擊走之

逆糾豫捻圍固始正月二十四日官軍大勝解圍遂
擾商城警報頻赴於楚副都統舒保奉檄督馬隊湘
勇防商城及英山羅田之敗賊與商城合勢益張李
布政孟羣派兵援勦賊踞金家寨守備楊光澤知縣
戴鴻經等堵截邀擊埽盡巢穴賊乘霧越嶺遁商城
肅清

江南軍攻金陵城賊於七橋窰等處

和大臣率張提督國樑總兵戴文英周天培副將李若珠等圍攻金陵三月初二日擊賊七橋堯殲賊數千直抵外濠毀更樓數座李若珠從間道撲賊巢設伏誘戰逆遣悍賊出西南門張提督督隊與李若珠合兵圍其二門戴文英亦會攻雨花臺印子山槍斃黃衣騎馬賊目張提督派王浚蔡起榮分道搜勦斃賊二千餘逆閉守不敢復出

賊入浙江界連陷江山常山開化諸邑

西安將軍福興奉

命督江西東路軍務駐兵弋陽時撫州逆勢窮蹙紛出竄
擾福將軍派員堵禦益勦益深欲爲蓄銳計退守廣
信圖進取逆遂由廣豐竄浙江境疊陷江山及常山
開化諸縣

上以福興遷延貽咎

詔切責之飭浙撫撥兵會勦

逆陷湖北麻城縣楚軍會勦

黃州所屬交安徽界者黃梅廣濟蕪水蘄州羅田等
縣而麻城則兼界河南之商城縣副都統舒保前督

兵出境堵守商城駐麻城者僅游擊李曙堂一營數百人河南軍既平金家寨逆竄踰嶺走了角山一日夜行百餘里三月十一日入麻城舒保聞警倍道回援至則城已陷矣擊敗南路之賊力遏其上竄黃陂孝感之路官大臣急調水師堵截湖路以防偷渡飛飭副將鮑超將駐宿松二郎河五營候補同知直隸州何忠駿將新募平江右營千人馳往協勦都將軍亦抽撥馬隊二起令富森保統帶官大臣又添派喜昌等馬二起分路馳援各道尅期集麻城

四月楚軍水陸大舉克復江西九江府城首從各逆悉
伏誅

逆首林啓榮竊踞以來植援湖口石鐘山彭澤等處
層柵密壘聲勢相依十易寒暑矣上年克復彭澤湖
口摧其翼角南岸肅清得以專力於九江逆百計死
拒糾皖逆分擾蘄黃翼緩其圍我軍已濬濠環攻更
番休息磨盤洲近大東門城垣外高岡危峙虬蟠虹
帶下可潛開地道乃精選勇壯築牆爲蔽內穴岡洞
城而外張旂幟木梯僞陳攻具以疑賊三月二十五

二十九兩日城下地道成轟坍東門十餘丈又坍其南門逆以火器力禦先登將士多死傷官大臣爲書勞苦意謂良將者

國家資爲股肱也精兵者良將之爪牙也股肱之力可勞而不可竭爪牙之用宜惜而不宜傷今逆勢雖衰堅城尙多未克諸君子已激義憤輕蹈危機後宜蓄養鋒銳勿輕淬厲馳各營徧慰之將弁兵勇聞溫卹語感泣愈奮自忘其苦是月初六日迤東而南地道復竣楊提督會集李布政續賓彭臬司玉麟總統水陸

軍十六營四門進攻初七日寅刻舉火地雷驟發磚石飛騰山岳震撼立塌迤東並南面城垣一百餘丈兵勇痛兩次傷亡之慘歔歔泣人盡思奮踴躍先登呼聲動天地衝鋒掩殺約兩時之久斃賊一萬六七千餘尸積填巷血流成渠賊首僞貞天侯林啓榮僞元戎李興隆據各賊目於亂尸中指出寸磔梟示以抒積憤從逆者悉數伏誅

楚軍攻勦麻城逆大勝

逆目陳玉成勾結捻首張落刑龔瞎子等匪衆三四

萬詐稱十萬竄踞麻城縣以守險築壘爲固計四門共疊五十八座溝濠層壘儼若天塹前調之軍已至城下胡巡撫復抽調九江湘副等四營併鮑超何忠駿等三千五百人均歸候選道李續宜統帶會勦定議四面破其壘然後肉薄攻城派營官張文煥等伏兵附近爲策應其南路則何紹彩西路則黃日勝皆張旂以出馬隊輔之李道舒副都統親督兩大隊攻其東壘北壘逆匪出衆迎拒我軍竭力苦戰斬悍賊百餘賊入壘自保乘勝攻圍關平東北各壘西路官

軍聞東北得手併命惟恐後時西壘亦破賊奔赴南壘城中出數千人協守礮落壘外如雨我軍四面伏兵齊起副將張文煥首先馳入賊營中礮陣亡弁勇憤怒驟進遂平南壘其殺賊五千有奇生擒七百餘兼斃其偽總制將軍指揮二十三名

官大臣胡巡撫籌議水陸東征

九江既克官大臣胡巡撫會籌東征之策江楚各留兵五千防潯陽以得勝之師水陸東征陸師渡江先皖北而後及於江南水師先安慶而後及於金陵請

於九江設轉運糧臺由安徽巡撫派員赴都與阿李
續實行營支應並陳李續賓忠勇誠篤可獨當大任
今越境遠征應否加銜准其專摺奏事以一事權而
免牽制得

旨報可李續賓加巡撫銜

江南軍攻雨花臺

逆屢伺官軍之懈悉衆突犯冀一勝以解其圍而雨
花臺形勝尤絕勢所必爭和大臣偵知逆情遣總兵
李若珠伏兵慈湖銅井二路并飭艇師嚴爲防倣親

與張提督更休疊巡是月逆果由雨花臺撲營大敗之斃賊千餘伏兵亦獲勝斬黃衣逆目二名賊艇亦爲水師所敗燬奪無數

揚州軍擊敗援逆於石橋

皖逆糾合捻衆竄石橋薛家口築營壘圖窺江浦爲金陵聲援德大臣派營總富慶阿等分路進攻先敗賊於大劉莊崔廟集平賊壘三座賊奔石橋復拒戰富慶阿等設伏合圍斃賊六七千生擒長髮千有奇賊之竄歸滁州及旁擾和州者亦悉數殲除

皖逆竄陷黃安縣

副都統舒保李道續宜方會勦麻城獲勝而安慶暨英山霍山諸逆由廣濟蘄州邊界繞光山商城趨入黃安陷之官軍分兵馳堵舒副都統率領馬隊往來策應頻戰雖小挫其鋒仍相持未決官大臣檄李布政續寶率五營兵上援是月二十六日抵黃安城外續寶本伍浙江布政使時逆入浙境金衢嚴處各府騷動浙省在京大員合詞奏請飭令李續寶速赴新任藉資捍禦得

旨俞允官大臣以楚皖安危大局所繫不可不剴切陳明
遂上言逆犯麻黃數道戒嚴我軍僅六千當驍賊五
倍之衆所恃者續賓威聲素著爲逆所憚耳浙江兵
力雖單江南大營已派弁往援疆圉可固楚北少有
蹉跌後患至深當今切要之計迅掃黃安全力以復
麻城如能使逆首聚殲於二邑不惟紓楚省邊患卽
江淮皖豫中原腹地亦可節次肅清

上嘉其切中機宜從之

福建軍擊敗政和諸逆黨

先是江皖逆竄入福建界陷政和縣邵武府城亦失
守遂踞浦城分擾建甯府閩浙王總督懿德福建慶
巡撫端飭候選知府陳維漢督帶兵勇進攻政和遇
賊於西門斬獲甚多又擊退浦城游賊署延建邵道
趙印川參將顧飛熊救邵武不及糾練丁結營鐵羅
巷連戰獲勝擒賊七十餘名

五月楚軍克復黃安麻城縣追至商城並防勦太湖潛
山英山霍山諸逆黨

皖逆踞麻城分陷黃安圖窺漢陽德安取道北竄官

大臣先飭湖江各師船層布要隘令曰使逆入腹地者罪無赦師船以死守之一面分撥馬步以勦爲防接值李布政續賓援兵至軍威益振逆計沮惟負隅抗拒而已隨定議攻黃安破其四堅壘而進以劈山礮轟城排礮繼之五月初二日賊開三門擁衆出諸將弁迎戰正酣忽旌旂捲地槍發如雷則布政之伏兵起麥田而驟來也賊大潰棄械紛逃陣斬僞丞相檢點指揮數十人賊尸滿野黃安縣城旣復乘勝抵麻城先是營將蕭積仰駐兵殷家河敗賊由黃赴麻

者扼險邀截生逃僅十之一二麻城逆皆膽落閉門不敢出初四日宵遁我軍窮追數十里殲斃不可億計越境至豫之商城皖之潛太英霍邊界大申撻伐楚南軍克復江西諸郡縣湖北分兵援浙

九江既克逆黨無固志而練勇愈奮湖南援軍卽選道蕭啓江知府今江西巡撫劉坤一進取撫州於正月二十九及三月初六等日先後收復新淦崇仁縣四月二十日攻撫州招降城賊黃揚水陸各軍相機登城殲賊數千人克復郡城餘匪逃至千金陂逼溺

千餘人竝經團練在流坊等處截殺無數餘匪踞金溪縣參將劉芳貴帶寶勇擊走之其卽選道張運蘭知府王開成一軍由永豐規取建昌二月十五日克復樂安縣三月初四日收復宜黃縣初六日攻破磁甌賊巢乘勝收復南豐縣遂於四月二十四日收復建昌府城各失守之守令帶同團練先後收復新城等縣時同知曾國荃都司張勝祿李祥和等會參將遮克敦布等攻吉安添竈長濠屢敗之白鷺洲天華山逆堅伏不敢出遂殲克吉水萬安二縣於是江西

陷城收復八九矣逆黨畏懾竄入閩浙境警報日至
時議趣李布政續賓赴浙官大臣疏爭之皖北獲安
及是見江西漸平兵力彌厚奏請

飭蕭啓江劉騰鶴等酌量抽撥由祁門甯國馳保杭州繞
出前路回攻爲捕鹿勢

皖逆復圖犯蘄州楚軍擊敗之

黃安麻城既克皖逆尙未之聞也思下游馬步大半
調防他處蘄州必單可逞志遂糾衆二萬餘築壘彌
陀寺南陽河分三路齊奔界牌石距蘄僅數十里唐

糧道訓方移勝軍馳勦派同知丁銳義游擊張嵩齡
當賊之右路游擊朱恢三率所部當賊之左路自勒
兵居中策應而分團勇爲三隊伏林菁深處賊中路
先敗陳德圍鄉隊突出夾擊敗其右路張嵩齡先以
羸兵誘賊至伏所故大勝復偕丁銳義朱恢三直上
山岡揮旂截擊左路賊不支紛紛潰三路俱捷燬賊
壘無數游擊余際昌又敗賊於白洋堡黃龍庵追至
彌陀寺逆聞風遁

福建軍克復光澤縣進攻邵武

江西逆闖入閩境由鐵牛關陷邵武等郡縣按察使
保泰移駐建甯杜賊蔓延而是時金陵逆勢亦窮蹙
力圖外援騷動皖南北迄浙閩邊界冀官軍分援延
旦夕喘

詔起復曾侍郎前往浙江辦理軍務浙屢報捷而逆之人
閩境者亦大受懲創參將顧飛熊旣擊敗浦城賊會
同副將賈開泰都司武明良先於四月十一日克復
光澤縣至是會各軍進攻邵武

江西軍擊敗常山逆於玉山子午口

時江西兵勇多調援浙境又撥五千守九江以扼皖楚之衝常山逆乘虛竄擾玉山子午口等處候選道李元度奉檄督附近鄉團多方抄擊殺斃黃衣目二名派都司彭定發結營屏風關逆傾巢撲營左營童梅華右營郭世源中營彭舉從水田截出生擒髮賊三十轟斃溺死者無數

江南軍攻復安徽來安縣並平毀金陵城外及沿江各逆壘

時江浦克復皖逆竄踞來安圖爲江南北聲勢和大

臣派總兵成明協領博奇等進勦立復縣城金陵逆
愈形危蹙急欲潰竄和大臣思先翦其翼密派水師
總兵李德麟督都司黃廣泰分勦繁昌縣賊囊土填
濠蹋堅壘數座土橋以平又派水師總兵吳全美游
擊郭定猷守備鄭榮勲攻破義橋楊家邨魯港等處
殲賊二千餘名沿江漸靖城逆憤恚出太平神策門
分犯大營副將張玉良馮子材游擊孔朝斌等踴躍
陷陣奪其大旗斬驍健數名賊敗退自龍脖子至莫
愁湖尸相積如蘘柵遂攻金川門悉毀東北城外之

壘柵收隊

浙江軍克復壽昌縣

逆黨自廣豐陷江山縣金華衢州處州三府所屬邑
焚掠屠毒蔓延幾徧總兵李定泰自遂安馳抵楊溪
擒賊不備悉燬其沿河營柵進逼壽昌縣之七里亭
分路兜擊斃逆目三名斬獲數百名立復縣城遂由
壽昌赴衢州會勦

六月揚州軍大捷於全椒

逆竄入全椒城三面築壘滁州九洲洲等處皆所盤

踞聲息相通總兵鞠殿華奉德大臣檄會督帶兵官
海全富明阿畱攝六合縣溫紹原分途攻全椒旋爲
九洲逆偵知遂出上游龍王廟並約滁州城逆剋
期會合意圖裹襲溫紹原富明阿奮兩翼擊之滁逆
敗走水陸並進大敗九洲之賊獲巨艦二鞠總兵
統大隊薄全椒城下蹋平賊壘縱火燒城門城內賊
撲救死拒而城外賊紛紛蟻聚海全衝入左右馳驟
當者披靡鉛子中其騎卽舍騎步戰刀矛電閃頭顱
滾滾如落瓜賊大城逆負隅不敢出

曾侍郎由長沙起程援浙

曾侍郎於七年二月丁父憂得假回籍假滿固請終制情詞哀切

上鑒允之至是以浙江危急

諭旨敦促起行六月十二日抵長沙由水路至九江登陸赴河口大營星馳入浙

浙江軍攻克武義永康常山江山開化五縣

總兵周天受督帶各隊攻武義縣六月初八日子刻克之賊竄永康大路復會和大臣所派副將陳開選

一軍追殺是日午刻克復永康縣自衢州解圍以後
總兵李定泰等派知縣丁峻等攻常山副將陶茂森
等攻江山江西巡撫派候選道李元度由屏風關進
兵會攻六月初四日勦賊於曹會關常山之賊乘夜
逃竄初五日克復常山縣江山之賊竄往浦城卽於
初六日收復江山其開化之賊亦經總兵秦如虎等
攻克數日之內連復五城

浙軍續克縉雲宣平縣

武義永康餘匪分竄縉雲宣平二縣周天受派副將

陳開選督同游擊吳再升移師縉雲分頭衝擊擒斬
及滾巖落澗死者不可勝計六月初九日克復縉雲
縣周天培督攻宣平四面兜擊斃賊無數亦於初十
日克之

浙軍復克處州府

諸縣城以次攻復衢圍亦解逆衆悉竄處州郡城失
守周天受飭副將陳開選瞿先仲等由陸路溫處道
俞樹風督兵勇由海口約期會勦潛伏敢死士人城
縱火爲內應逆堵禦未備大軍猝至環攻城中復火

起開門竄往松陽遂於六月十六日克復府城

浙江分軍援福建

閩逆蔓延猖獗所復各城旋失又陷松溪崇安建陽等縣建甯府亦被圍告急浙江晏巡撫端書以衢處少安卽檄總兵饒廷選副將張騰蛟督兵勇馳援閩省又出師江山界勦浦城逆巢副將陶茂森游擊韓廷桂統之咨商幫辦軍務周天受李定泰各挑選勁旅三千派員管帶取道龍泉赴浦城會勦是時曾侍郎由河口營到浙復奉

命援閩省方擬自鉛山進軍逆始有懼心諸軍未合又潛圖牽掣之計矣

七月江南軍水陸皆捷

泥汊河居金陵上游前爲楊提督水師攻克後逆復濬濠築壘爲犄角勢和大臣遣總兵李德麟帶艇船集鄉團攻毀之總兵李若珠復督水陸軍巡上下要隘城逆不敢出和大臣與總統諸軍張提督國樑定議在金陵城外建長圍以困賊鑿山越水屹若長城周城百餘里諸營大小相維度圍形之險夷定攻具

之厚薄復於閒厝口等處連舢板船爲水營城逆益
盛增防各門潛築柵壘於壽德州悉衆出撲欲潰我
長圍張提督令南北軍分攻太平金川門東西軍各
擣雨花臺自七里洲至壽德州則令游擊賴鎮海等
駛艇師擊破之張提督策馬率諸軍前進勇氣百倍
逆不能當我軍踰溝焚賊壘無數殲斃千計

皖逆復竄陷廬州總兵蕭開甲知府武成功死之
逆黨踞三河窺伺廬城福巡撫以師老無功

召入京候

簡用以勝都統保爲

欽差大臣調揚防之翁侍郎同書巡撫安徽幫辦勝大臣
軍務行未至李布政孟羣署巡撫事駐兵店埠逆衆
乘虛於七月十五日竄入廬州城總兵蕭開甲知府
武成功督勇堵禦衆寡不敵皆血戰陣亡

閩逆竄回江西界圍廣豐玉山城官軍擊走之

閩省諸軍重克光澤收復建陽解順昌之圍先後抵
浦城逆爲牽掣計遣其黨擾江西廣豐旁趨玉山縣
平江營營官守備彭大壽候選知縣夏宏江迎戰於

廣豐之五都小挫入城堵禦逆繞東門山之背悉銳來撲三面環攻於小北門南門開挖地道大壽兩次冒險衝賊營均將地道填塞十五日夜復出隊破其五壘賊始越嶺去其擾玉山者李道元度率勇守禦自是月十五至二十二等日出城迎擊殲斃無算城圍亦解逆黨盡棄其輜重竄德興

福建軍克復松溪政和甯化三縣浙江收復龍泉縣合境肅清

浦城逆分黨四竄諸郡縣皆已解圍知府陳維漢勦

松溪連戰勝之政和逆遣黨來援未至攔截山腰擒
斬其酋餘匪潰散我兵整隊回攻於六月二十九日
克復松溪縣游擊袁良政和縣知縣楊國榮督率兵
勇於七月初一日克復政和縣其甯化縣踞逆爲代
理知縣劉潤田挑選壯勇假稱援賊賺開南門知府
雷瑞光督隊攻入於七月初六日克復閩困稍紓而
浙江於是月初七日收復龍泉縣已全省肅清矣
浙援軍克復浦城縣閩兵克復崇安縣

逆在福建以浦城爲老巢晏巡撫咨商援勦亦以會

集浦城爲先著總兵周天受周天培督游擊馬承恩等自龍泉出師節次勦賊所至輒斬其驍目復在龔邨與賊力戰追奔三十里乘勝由關莊松波橋攻浦城之東北門毀城外賊壘七座逆匪喪膽奪門而遁分途截殺槍傷溺斃無數遂於七月二十二日克復縣城福建甯鎮游擊王興業亦於二十九日由四渡橋進攻崇安縣緣梯登城克之建甯肅清

廬州逆竄定遠縣境皖軍擊走之

勝大臣之自豫赴皖也沿途勦捕聞鳳陽臨淮捻逆

與粵逆勾結意圖分撲遣游擊唐玉輝攻鳳陽獲捷
臨淮匪黨分擾紅心驛亦經副都統銜薩薩布等殲
除略盡廬逆聞風懼派匪竄至定遠縣之界牌勝大
臣派副都統穆騰阿副都統銜克蒙額等迎勦遇賊
於藕塘穆騰阿督馬隊兜擊施放連環槍礮轟斃四
五百名燬柵壘七座逆黨繞至池河襲官營亦擒斬
疊勝界牌藕塘賊皆潰奔關山大路竄江浦

八月楚南援軍克復江西吉安府

逆踞吉安最久自瑞臨撫建先後克復江西漸就肅

清惟吉安孤城死守先是七年二月知府曾國荃回
湘添募吉中營勇水陸進攻十月紮天華山屢攻未
克八年七月二十一日以後官軍緣城直上斃賊甚
多賊已膽落八月初四日曾國荃會道員趙煥聯參
將遮克敦布游擊成章鑑胡定泰副將劉培元守備
周惠堂等水陸環攻毀賊划於白鷺洲初十日賊以
木簞順流衝營禦之於梭潭灣等處小划小簞擊奪
淨盡並擊散大簞一座斃賊無數賊之踞城者有二
股一爲僞先鋒李雅鳳一爲僞丞相翟明海屢敗互

相疑忌翟明海爲李雅鳳致死其黨於十五日夜乘船忽遁曾國荃等各帶礮船迎擊各路兵勇薄城而登克復府城生擒賊首李雅鳳及偽副將軍吳大法等解省正法其初十日竄出之賊陷崇仁縣知府江忠義馳往攻克二十日竄陷宜黃縣亦經知府元善收復餘匪於克吉安之次日追至茶山嶺等處勦殺殆盡江境肅清

楚軍克復安徽太湖縣

李布政續賓旣自爲一軍得專達與都將軍由英霍

進攻太湖縣溪山險阻逆屢抗未下時閩省騷動慶
總督端飛調參將石清吉赴援清吉者入皖之行軍
驍將也統飛虎三營屬將軍麾下將軍以情白官大
臣疏畱之而廬州陷後翁巡撫兵新敗器械亡失告
急於布政令繕豫赴廬官大臣又上言太湖方血戰
有功若舍之應廬州緩不濟急

上遽其議遂有八月十五日攻克太湖之捷先是賊於東
岸及楓香舖小池驛東山頭各築堅壘都將軍李布
政飭副將朱希廣趙克彰何紹彩總兵李續燾參將

謝永祐等分段攻城用火箭燃燒火藥賊匪駭散各
勇奮呼登城各路搜殺克復縣城並攻毀黃泥港賊
壘共計斃賊六七千人各軍進攻潛山石牌

楚軍克復江西安仁縣

曾侍郎奉

旨改道援閩未至而閩逆復分股萬餘人回竄鐵牛關由
江西之瀘溪金溪並許灣鄧家埠一帶入踞安仁縣
曾侍郎親率所部移營弋陽派道員張運蘭自河口
鎮拔營與知府王文瑞等軍先絕賊由樂平萬年分

竄之路又派主簿吳國一軍與張運蘭等分路進攻
安仁令平江營戰船橫截河面使賊不得偷渡張運
蘭等行至青山埠卽分軍誘賊出城伏兵齊起賊敗
入城跟蹤追勦逆閉關抗拒矢石如雨各勇攀堞而
登縱火焚燒水師戰船亦自河面轟擊賊不得逃伏
尸山積計斃四千餘名其奪路夜奔官軍追殺者約
二千餘人水師轟斃溺斃者千數百人生擒一百七
十六名立將安仁縣城克復

福建軍克復建陽

逆踞建陽城以水吉邨爲險要置重壘相虬結周總
兵天受等旣敗賊於迴龍塘卽進攻建陽分遣副將
郭啓舉往老佛庵都司榮升往上瑤襲勦二處皆狡
逆三窟也逆果自水吉出黨二三千名分路來援我
軍迎擊痛創之賊紛紛覓水逸去遂焚燬二處賊巢
合兵攻水吉南北岸賊壘悉破擒斬無算七月初八
日己革知府匡開督帶濠墩等鄉聯勇至聯勇首先
登城官軍繼進遂復縣城

福建軍克復邵武府

自崇安建陽克復後逆衆聚於邵武府八月十六日
都司武明良自光澤帶兵前往協同上圩聯丁攻進
西北兩門千總吳連升管帶平安軍親兵協聯丁入
東門斬馘甚多卽日克復府城計江西逆匪擾竄閩
疆疊陷郡縣十城經慶總督端出省督勦浙江等軍
馳援次第攻克竝有爲本處守令率聯丁收復者至
是一律肅清

楚軍進克安徽潛山縣及懷甯縣屬之石牌鎮

潛山石牌爲皖省南北要道逆厚集黨翼以援應諸

路而抗我東征之師太湖既克都將軍等遣副將趙克彰率精銳抵潛山營北門外之彰法山賊蠭擁來撲殪悍賊數人副將何紹彩等左右包抄馬隊繞至賊後四面掩襲署知縣胡履坦率鄉團助戰殲賊千餘羣賊驚潰入城率城賊宵遁八月二十一日克復縣城追奔三十餘里前後斃賊七八千人遂派翼長多隆阿副將鮑超率馬步於二十五日分二路取石牌一由李家店攻破雷公埠收下石牌一由蠟樹柯收上石牌石牌鎮老巢皆平斬獲與克復潛山縣等

官大臣飛章報捷竝以吉林黑龍江馬隊屢建奇功
節次傷病九十餘員名請如數選換竝請添撥兩省
西丹各一二百名以濟兵力得

旨允行西丹者清文餘丁也

九月揚州城復陷大軍退保邵伯萬福橋等處

逆首陳玉成自上游率大股會九洲羣逆越江浦
猛撲浦口德大臣大營幫辦總兵鞠殿華迎勦賊三
路兜截我兵進退爭一橋致大挫和大臣派參將馮
子材總兵向奎率兵六千先後來援賊分兵綴之仍

力撲浦口軍心不固八月二十日大營失陷升用知府南河同知孔繼鑠河南知府宣維祁儘先副將陳昇等均陣亡賊疊陷江浦天長儀徵等縣竝分賊攻六合大隊徑奔揚州犯西北二門營總富明阿督馬隊出北門與守備詹起綸之勇會合包抄張德彪亦帶勇於西門力拒殊死戰乃賊勢太衆於九月初三日由南門攻破入城初浦口之陷德大臣登江口水師艇船繞赴揚州乃與肅辦等定議守邵伯防北竄竝紮營萬福橋等處以固東路

楚軍克復安徽桐城舒城二縣馬隊會艇師進勦安慶
大捷削平城外諸逆壘

大軍之入皖也楊提督率艇師沿江東下遙爲聲勢
自太湖潛山復城後都將軍親督馬隊分道勦安慶
其由石牌抵桐城者惟李布政一軍副將趙克彰爲
前隊擊斃桐城撲營賊一千六七百名生擒逆目劉
清桂等蹋賊壘四座後隊肉薄城根九月初七日總
兵李續燾督勇先登克復桐城縣李布政獎勵三軍
整隊前進舒城逆聞桐城已拔皆無固志續燾攻城

西北賊巢盡破而城東南亦爲副將李存漢趙克彰圍亟十八日逆悉衆棄舒城走入三河僞城死守運同丁銳義率團練搜殺賊尸盈路李布政之師遂追賊至三河時都將軍率馬隊攻安慶破大橋頭賊壘翼長多隆阿自總埽副將鮑超自團山趨集賢關賊棄壘而遁楊提督水師亦至立毀北門近城四大壘東西山灣小壘亦埽盡無遺復奪獲賊艇於樅陽洲港悉拔其木椿鐵練之攔截官軍者先後斃賊五千餘安慶逆膽寒氣奪閉城不出

2
卷一
三
皖軍及清江防軍拒賊於三河集獲勝

逆匪踞天長後意圖北竄分股二萬人於九月十二日直撲三河集集在清江浦蔣壩之南濱臨洪澤湖向設仁義禮智信五壩以時啓閉淮揚道郭沛霖以逆勢方熾畱三河關口不堵以存天險庚河督長派候補道赫特赫訥等督勇駐蔣壩守之賊至欲覓渡赫道等開礮拒之適勝大臣派副都統麟瑞等督兵馳至於商橋遇賊殲斃多名十三日復加痛勦蔣壩防兵亦竭力堵擊賊始奔潰悉數南遁清江以安

江南軍會北軍克復揚州城

逆踞城後屢至西北山焚掠竝及黃珏橋圖犯邵伯
警報日達江南營張提督國樑領大軍渡江九月十
四日夜挑選精銳攻東南兩門賊擁衆出撲我軍一
可當百賊卽敗退游擊馮觀勝黃靖分路截殺突有
悍賊出北門張提督飛馬迎擊如風掃敗簞賊狂奔
倒斃城不及閉江北軍鞠殿華成明富明阿亦相繼
驟進卽於十五日克復府城遂移攻儀徵縣十六日
亦克之

逆陷六合縣補用道溫紹原死之

縣居金陵北以浦口爲咽喉形勢鞏固粵逆入鄂之
歲湖北江夏人溫紹原權知六合縣事募鄉勇爲守
禦計長江東下重城皆望風瓦解六合以彈丸獨存
大小百戰屢殲賊衆歷六年之久逆以全力始破之
揚州之變陷也德大臣駐邵伯不復能顧六合逆以
大隊圍城紹原激勵諸同志涕泣誓以死守割衫嚙
指草血書告勝大臣乞援不至張提督十五日復揚
州亟引兵救六合十七日至陳板橋遇大股賊接仗

不得驟進賊知張軍且至十八日寅刻穴地道轟城
城塌十餘丈蟻附而上紹原聞變攜妻王氏次子候
選知縣溫輔材長媳陳氏投水以殉從事者多不屈
死紹原以積功擢道員加運使銜充江南大營翼長
仍留防六合代其職者爲李守誠江西宜黃舉人選
授六合縣清儉勤幹城陷自縊於堂上有總兵羅玉
斌者自來安奉檄守六合賊入城大呼曰我羅總兵
也手刃數賊而死投効知縣馮明本典史葉楸奎都
司王家幹夏定邦守備余承恩城守千總海從龍等

皆巷戰陣亡

皖軍擊敗天長縣竄黨進克縣城

勝大臣擊敗三河集之賊抵行營聞馬頭城上審一路逆黨久屯聚恣擄脅卽派營總薩薩布穆隆阿等分途捕剿屢有斬擒而天長竄匪復擁踞馬家壩憑河負險爲南北通聲氣乃遣副將張德勝由高橋進直抵馬家壩賊大潰縱火焚毀其巢穴廬室無存九月二十四日攻天長先有捻首李昭壽歸誠效順勝大臣奏請

賞給三品頂戴花翎至是爲內應率衆由內殺出前後夾擊賊勢不支棄城逃竄卽將縣城克復搜殺髮逆淨盡事聞奉

旨李昭壽更名世忠以參將卽補並飭嗣後各路軍營遇有被陷賊中棄邪歸正者果能立功自贖克復城池亦當一體施恩以昭激勸

楚南軍勦竄匪於江西新城等縣殲之

閩省逆竄回江西新城等縣屢次堵勦而此出彼入逃境騷然曾侍郎耆巡撫齡以補用道劉長佑誠果

善戰添派兵勇專任之劉道偵新城賊尤衆獨督軍
進連戰皆勝斃賊三四千羣匪自熊邨來援遣李明
惠等迎擊於南豐新城邊界之呂公嶺李家山等處
斬首三百級適遇江忠義軍遂合兵追至七都殺賊
一千六七百名復由七都至橫邨生擒五百七十餘
獻馘四五千級劉道督隊至沙坊傳坊戮悍賊百餘
進盪甘家隘老巢僞指揮數十悉伏誅計殲賊逾萬
另股由瀘溪竄安仁經張運蘭等及各屬團勇水師
合勦殲斃七八千名江境之賊約略無旣類矣

十月江南軍克復溧水縣

皖逆援金陵於九月復陷溧水署知縣周觀銘等督戰陣亡逆遂分衆築壘江藍埠等處爲扼要持久計和大臣遣總兵張玉良由祿口進攻埭賊壘無數夜渡河追擊盡平江藍埠斬首千餘乘勝合圍溧水城和大臣等以城池單小必可旦暮克而銅井六郎橋龍磨山高古山皆要隘援賊所必爭逃賊所必趨不可不豫爲防總兵李若珠飭所部副將劉季三游擊宋紹科等往來巡徼張總統駐兵高古山以備侵軼

城逆果不支玉良督副將馮子材陳朝宗等裹創力戰豎雲梯登城殺守陣而入十月初七日克復逆狂奔西竄伏兵節節兜抄斃賊四五千名無一得脫其援賊夾攻高古山大營張提督親率數十騎怒馬陷陣左衝右突萬衆披靡刺斃其黃衣逆目總兵李若珠亦督部將各處兜截生擒僞銅天侯斬僞國宗洪姓斃賊五六千名賊尸相望合兵窮追直抵江甯鎮燬賊卡壘數十座小丹陽以至采石磯老巢悉平楚軍失利於三河巡撫銜浙江布政使李續賓死之

我軍既克桐舒皖逆待救攻廬州益急惟三河鎮爲水陸衝途欲援廬州非攻拔三河不可馬隊已隨都將軍會勦安慶所克潛太舒桐四縣畱兵駐防李布政所統銳卒僅四五百人而已逆設立僞城於三河磚壘九座憑河扼險李布政督隊至結營連戰皆捷殺賊數千我軍亦陣亡參將蕭意文都司胡在位及兵勇千餘而逆首陳玉成李秀成李世賢由和州江浦六合廬江等處分道合援連營數十里我軍較敵不及二十分之一逆屢出挑戰李布政慷慨誓師部

下士皆涕泣効死殺賊過當賊四面圍裏愈集愈厚
又喪參將彭友勝游擊胡廷槐饒萬福等丁勇盡銳
突出歸伍者不滿三千十月初九日親自督戰盪決
直前游擊鄒玉堂杜廷光守備趙國棟力竭死七營
均陷李布政知勢不可爲焚香九叩首捧

廷寄

硃批奏摺焚之曰不可使

宸翰落賊手次晨復督衆血戰竟日力竭陣亡臨戰時顧
諸將曰我義當死戰報

國諸人可自圖生也僚佐謂公不負

國我等豈可負公皆願死戰卽補道孫守信同知會國華
運同丁銳義何裕何忠駿同知直隸州董容方知縣
王揆一等數十餘員皆從死其棄壘先逃及不能援
應之總兵李續燾等八員經官大臣胡巡撫奏參逮
問擬以遣戍褫職布政湖南湘鄉人幼讀書端凝沈
毅器識過人咸豐二年奉父命應羅布政澤南倡辦
團練七年之間克復四十餘城身經六百餘戰一時
諸將無與倫比死之日湖南北及江皖四省士民巷

哭如失所依舒桐難民猶不遠千里負送忠骸歸葬
官大臣等覲縷上陳得

旨加總督銜照總督陣亡例優卹並奉

硃批詳覽奏牘不覺卽涕惜我良將不克令終尙冀其忠
靈不昧他年生申甫以佐予也

煌煌天語李總督雖死猶生矣

楚軍擊平荊橋諸賊壘

三河之敗爲東征一大蹉跌遠近震動都將軍方攻
安慶屢獲勝仗忽聞三河之警勒兵回援已無及矣

三河潰卒入桐城致潛太復爲賊踞將軍恐悍賊抄襲收潰卒由石牌駐兵宿松而唐道訓方李道續宜舒副都統保奉官大臣胡巡撫檄率馬步大軍赴潯陽節次進援將軍喜曰三河恥可雪矣吾當爲諸軍先遂進勦黃泥營賊衆敗之復督副都統多隆阿大戰荊橋逆前隊數萬迎拒十合十勝士憤恨氣盛賊雖衆莫敢當乘勝奮殺賊衆棄壘而逃踰平三十餘座斃賊六千餘生擒五百有奇軍勢復振

浙軍援閩克復諸縣城

江西逆攔入閩界肆擾將樂縣竝陷浦城永吉建陽
順昌各城曾侍郎由杉關入閩勦賊軍士染患時疫
者數千人遂駐建昌先檄周總兵天培督將弁赴援
所向克捷張道運蘭一軍肅清將樂等處逆分三路
復竄回江西遂以次收復浦城順昌諸城是時汀州
府甯化長汀等城均陷旋亦收復惟連城尙聚賊萬
餘人

十一月皖南各軍先後勦逆獲勝

皖南祁門青陽之賊竄犯崇覺寺及卓邨和大臣派

總兵江長貴分路迎勦自九月初九日至十月初三日疊敗賊於九鳳嶺苦竹橋焚燬陵陽鎮賊壘其太平縣等處竄匪亦經官兵擊退又南陵之匪竄擾甯國爲總兵米興朝等抄賊於赤嶺牧家亭敗之逆從烏溪渡河水陸並進爲提督鄧紹良等殲斃蕪湖之賊從鷹卹橋小蒜山五里亭等處來犯亦經鄧提督等分途迎勦悉有斬擒逆復由小荊山撲孤山壩兵少卻鄧提督飭諸軍進勦奪賊艇數隻獲其僞丞相承天侯首級陣斬將軍各賊目乘勢追奔又連捷於

黃池黃島坡等處甯國之匪復竄水陽鎮擾至雁翅
陡門和大臣所派總兵戴文英副將朱承先等於十
一月初八日三路攻擊游擊馮觀勝衝入賊隊殲賊
無數立克逆卡二道進薄賊巢鏖戰五時之久殺賊
千餘名奪獲賊械無算又賊股分陷徽州之婺源縣
時前江西巡撫三品京堂張芾奉

旨督辦皖南軍務派副將王夢麟等會同署提督周天受
督軍進剿十月初二及十一月初三十六等日疊獲
勝仗復與白沙關總兵李定泰一軍會合

十二月江西逆匪竄信豐陷南安府城

景德鎮陷後官軍失利於鱸魚山竝陷東流縣揚言
欲竄湖口九江等處及閩逆回竄由瑞金會昌徑入
信豐抵南安界警報日急張道運蘭奉檄調自閩赴
建昌曾侍郎謂曰閩事不足慮信豐南安賊亦無害
所以調至者圖商景德鎮耳若東犯廣信西踞湖口
則九江危矣卽日撥帶勁旅倍道馳抵景德鎮與劉
道于清會勦屢戰皆捷賊鋒少挫入南安城者旋卽
收復信豐城堅守得完

楚軍敗逆於南陽河等處

三河鎮之失桐舒潛太四縣復陷皖楚之交游賊往來無停趾官大臣已調兵赴援都將軍以斬黃羅麻者九江之尾閭而全楚門戶也急派李道續宜督知府唐協和等分駐要隘備不虞又派蔣道凝學一軍趨宿松界飛飭總兵普承堯劉道騰鶴集重兵防潯陽彭澤湖口等處北岸始固而自龍坪黃州以上至漢鎮水師礮船聲勢聯絡則以知府蕭翰慶副將李成謀統之部署嚴密重振軍威荊橋旣勝唐道訓方

游擊余際昌阿達春等復有南陽河之捷自後又敗賊於花涼亭楓香驛蓮花塘分茅嶺斬賊一萬二三千有奇

湖北胡巡撫駐軍黃州

巡撫以七月丁母憂照軍營例回籍穿孝百日固請終制會三河變起李巡撫死綏

朝旨敦迫乃勉起督師念墨經從戎金革無避之義以兵事自任十二月初八日渡江駐黃州蒐軍實察夷傷卹死弔孤汰弱補闕經意規畫兵氣益揚